

## MIRENNA

Spichi r'oru  
ntô vespri lucenti ri sulì  
ô punenti u lauri  
ntâ gghiugnu ... è l'unna rô mari.  
E i mitituri  
marinari ri terra  
a-ll'antu abbuccati cummàttunu  
annijati 'i sururi.

A-ll'erta  
u capurali...r'ogni ttantu s'addhrizza  
e finarmenti: - Arriva! -  
Eni a massara ca veni rê casi  
ca teni  
ntê vrazza 'n cufinu  
e quannu arriva  
lesta  
a cannavazza sut'â maccia stira e cciama: - A mirenna! -

Arràncunu i picciuotti tiniènnisi u schinu  
nta-ll'ùm'ra tràsunu a-ccucunièdhu o a-ddhinucciùni.  
E menthri l'uòcci sicùtunu u nziru  
ppi 'n sursu ca stuta l'arsura  
a manu stenni u llammicu ppi 'm muorsu ri pani  
e n'auliva  
e na cozza 'i cipudha  
e na fòggia 'i lattuca spunzata nt'âcitu  
u cori  
pp'âbbramu rô labbru... ca penni  
'm masuni: "Ccâ saluti! " - ô carratièdhu ca passa ntô gghiru  
'rrisbigghiannu l'ardhuri a ccu spennu n'allecra rrisata  
e ccu cunta a passata  
ri 'n cuccidhu ri vita: "lu...na sira...a Raùsa.."

Ma è gghià l'ura:  
U capurali si susi: - Bbiniritta! -  
L'umm'ra nisciènnu strazzunu cchê pieri  
e a-ll'antu  
r'agnunu a so lenza trasciunìa  
sut'ô sulì ntâ ristuccia  
'nzina a qquannu codha.